

四庫全書

集部

欽定四庫全書

集部

文山集卷十八

詳校官庶吉士_臣李傳熊

主事_臣呂雲棟覆勘

總校官進士_臣朱鈐

校對官主事_臣陳文樞

謄錄監生_臣文昌仔

欽定四庫全書

文山集卷十八

宋 文天祥 撰

指南前錄

自序

予自吳門被命入衛守獨松關廼王正二日除浙西大制撫領神臯子辭尹引帳兵二千人詣行在日夕贊陳樞使宜中謀遷三宮分二王於閩廣元夕後予所部兵

皆聚於富陽朝廷擬除予江東西廣東西制置大使兼
廣東經畧知廣州湖南策應大使未及出命陳樞使已
去國十九日太皇除予右丞相兼樞密使都督諸路軍
馬時北兵駐臯亭山距脩門三十里是日北帥即引董
叅政以兵屯權木教場城中兵將官紛紛自往納降予
欲召富陽兵入城已不及事三宮九廟百萬生靈立有
魚肉之憂會使輟交馳彼約當國相見諸執政侍從聚
於吳左丞相府不知計所從出交贊予一行國事至此

予不得愛身且意彼尚可以口舌動也二十日至臯亭
山詰其帥前後失信其帥辭屈且謂決不動三宮九廟
決不擾京城百姓留予營中既而呂師孟來予數罵其
叔姪愈不放還賈餘慶者逢迎賣國乘風自使代予位
於是北兵入城所以誤吾國陷吾民者講行無虛日比
知賣國非予所容也相戒勿令文丞相知未幾賈餘慶
吳堅謝堂家鉉翁劉岳皆以府第為祈請使詣北方盖
空我朝廷遂將甘心焉二月八日諸使登舟忽北帥遣

館伴逼予同往予被逼脅欲即引決又念未死以前無
非報國之日姑隱忍就船方在京時富陽兵已退趨婺
州予欲俟間還軍若不自脫至是欲從道途謀遁亦不
可得至京口留旬日始得鹽商小舟於二月晦夜走真
州朔日守苗再成相見論時事慷慨流涕予致書兩淮
間合兵興復苗贊之甚力初三日早制司人來迺出文
書謂丞相為贖城欲不利於我苗不以為然送予出門
勸奔淮西予謂此北反間也否則托辭以逐客也李公

仁人使見予必感動遂之維揚苗遣五十兵四騎從行
夜抵西門欲待旦求見呵衛嚴密鼓角悲慘杜架閣謂
李公必不可見徒為矢石所陷不如渡海歸從王室予
然之自是日夜奔南出入敵衝犯萬萬死道途苦難不
可勝述嗚呼予之得至淮也使予與兩淮合北人懸軍
深入犯兵家大忌可以計擒江南一舉而遂定也天時
不齊人事好乖一夫頓困不足道而國事不競哀哉予
至通聞二王建元帥府於永嘉陳樞使與張少保方以

李郭之事為已任狼狽憔悴之餘喜不自制跋涉鯨波
將躡屨以從意者天之所以窮餓困乏而拂亂之者其
將有所俟乎德祐二年閏月日廬陵文天祥自序

後序

德祐二年二月十九日予除右丞相兼樞密使都督諸
路軍馬時北兵已迫脩門外戰守遷皆不及施縉紳大
夫士萃於左丞相府莫知計所出會使輟交馳彼邀當
國者相見衆謂予一行為可以紓禍國事至此予不得

愛身意彼亦尚可以口舌動也初奉使往來無留北者
予更欲一覘北軍而求救國之策於是辭相印不拜翌
日以資政殿學士行初至北營抗辭慷慨上下頗驚動
彼亦未敢遽輕吾國不幸呂師孟構惡於前賈餘慶獻
諂於後予羈縻不得還國事遂不可收拾予自度不得
脫則直前詬其帥失信數呂師孟叔姪為逆但欲求死
不復顧利害彼雖貌敬實則憤怒二貴酋名曰館伴夜
則以兵圍所寓舍而予不得歸矣未幾賈餘慶等以祈

請使詣北彼驅予并往而不在使者之目予分當引決
然而隱忍以行昔人云將以有為也至京口得間奔真
州即具以北虛實告東西二閫約以連兵大舉中興機
會庶幾在此留二日維揚帥下逐客之令不得已變姓
名詭蹤跡草行露宿日與北騎相出沒於長淮間窮餓
無聊追購又急天高地迴號呼靡及已而得舟避渚洲
出海道然後渡揚子江入蘇州洋展轉四明天台以至
於永嘉嗚呼予之及於死者不知其幾矣詆大酋當死

罵逆賊當死與貴酋處二十日爭曲直屢當死去京口
挾匕首以備不測幾自剄死經北艦十餘里為巡船所
物色幾從魚腹死真州逐之城門外幾徬徨死如揚州
過瓜洲揚子橋竟使遇哨無不死揚州城下進退不由
殆例送死坐桂公塘土圍中騎數千過其門幾落賊手
死賈家庄幾為巡徼所陵迫死超高郵迷失道幾陷死
質明避哨竹林中邏者數十騎幾無所逃死至高郵制
府檄下幾以捕係死行城子河出入亂屍中舟與哨相

後先幾邂逅死至海陵如高沙常恐無辜死道海安如
臯凡三百里敵與寇往來其間無日而非可死至通州
幾以不納死以小舟涉鯨波出無可奈何而死固付之
度外矣嗚呼死生晝夜事也死則死矣而境界危惡層
見錯出非人世所堪痛定思痛痛何如哉予在患難中
間以詩記所遭今存其本不忍廢道中手自抄錄使北
營留北關外為一卷發北關外歷吳門毗陵渡瓜洲復
還京口為一卷脫京口趨真州揚州高郵泰州通州為

一卷自海道至永嘉來三山為一卷將藏之於家使來者讀之悲予志焉嗚呼予之生也幸而幸生也何為所求乎為臣主辱臣死有餘僇所求乎為子以父母之遺體行殆而死有餘責將請罪於君君不許請罪於母母不許請罪於先人之墓生無以救國難死猶為厲鬼以擊賊義也賴天之靈宗廟之福脩我戈矛從王于師以為前驅雪九廟之耻復高祖之業所謂誓不與賊俱生所謂鞠躬盡力死而後已亦義也嗟夫若予者將無往

而不得死所矣向也使予委骨於草莽予雖浩然
無所愧怍然微以自文於君親君親其謂予何誠不自
意返吾衣冠重見日月使旦夕得正丘首復何憾哉復
何憾哉是年夏五改元景炎廬陵文天祥自序其詩名
曰指南錄

赴闕

楚月穿春袖吳霜透曉韉壯心欲填海苦膽為憂天役
役慙金注悠悠歎瓦全丈夫竟何事一日定千年

所懷

予自臯亭山為敵所留深悔一出之誤聞故人劉
小村陳蒲塘引兵而南流涕不自堪

只把初心看休將近事論誓為天出力疑有鬼迷魂明
月夜推枕春風晝閉門故人萬山外俯仰向誰言

自嘆

正月十三夜予聞陳樞使將以十五日會巴延於
長堰予力言不可陳樞使為尼此行予自知非不

明後卒自蹈殊不可曉也

長安不可詣何故會高亭倦鳥非無翼神龜弗自靈
乾坤增感慨身世付飄零回首西湖曉雨餘山更青

鐵錯

貔貅十萬衆日夜望南轅老馬翻迷路羝羊竟觸藩
武夫傷鐵錯達士笑金昏單騎見回紇汾陽豈易言

和言字韻

予以議論太烈人愈疑憚不得歸闕將校官屬曰

有叛去世道可歎

悠悠天地濶世事與誰論清夜為揮涕白雲空斷魂死
生蘇子節貴賤翟公門前輩如瓶戒無言勝有言

愧故人

九門一夜漲風塵何事癡兒竟誤身子產片言圖報鄭
仲連本志為排秦但知慷慨稱男子不料蹉跎愧故人
王勒雕鞍南上去天高月冷泣孤臣

求客

眼看銅駝燕雀羞東風花柳自皇州白雲萬里易成夢
明月一間都是愁男子鐵心無地着故人血淚向天流
鷄鳴曾脫函關厄還有當年此客不

紀事

予詣北營辭色慷慨初見大酋已延語之云講解
一段乃前宰相首尾非予所與知今太皇以予為
相予不敢拜先來軍前商量已延云丞相來勾當
大事說得是予云本朝承帝王正統衣冠禮樂之

所在北朝欲以為國歟欲毀其社稷歟大酋以奉
詔為解說謂社稷必不動百姓必不殺予謂爾前
後約吾使多失信今兩國丞相親定盟好宜退兵
平江或嘉興俟講解之說達北朝看區處如何却
續議之時兵已臨京城紆急之策惟有款北以為
後圖故云爾予與之辨難甚至云能如予說兩國
成好幸甚不然南北兵禍未已非爾利也彼辭漸
不遜予謂吾南朝狀元宰相但欠一死報國刀鋸

鼎鑊非所懼也大酋為之辭屈而不敢怒諸酋相
顧動色稱為丈夫是晚諸酋議良久忽留予營中
當時覺彼未敢大肆無狀及予既繫維賈餘慶以
逢迎繼之而國事遂不可收拾痛哉痛哉

三宮九廟事方危狼子心腸未可知若使無人折狂鯨
東南那箇是男兒

春秋人物類能言宗國常因口舌存我亦瀕危專對出
北風滿野負乾坤

單騎堂堂詣敵軍古今禍福了如陳北方相顧稱男子
似謂江南尚有人

百邑無厭不可支甘心賣國問為誰豺狼尚畏忠臣在
相戒勿令丞相知

慷慨輕身墮蒺藜羊生乳是歸期豈無從史私素盜
恨我從前少侍兒

英雄未肯死前休休風起雲飛不自由殺我混同江外去
豈無曹翰守幽州

紀事

正月二十日晚敵留予營中云北朝處分皆面奉
聖旨南朝每傳聖旨而使使者實未曾得到簾前今
程鵬飛面奏太皇親聽處分程回日却與丞相商
量大事畢歸闕既而失信予直前詰責之辭色甚
厲不復顧死譯者再四失辭予迫之益急大酋怒
且愧諸酋羣起呵斥予益自奮文煥輩勸予去彼
之左右皆喑喑嗟嘆稱男子心

狼心那顧軟銅盤舌在縱橫擊可汗自分身為齏粉碎
彼中方作丈夫看

紀事

正月二十日至敵營適與文煥同坐予不與語越
二日子不得回闕詎北人失信盛氣不可止文煥
與諸酋勸予坐野中以少遲一二日即入城皆給
辭也先是予赴平江入疏言叛逆遺孽不當待以
姑息乞舉春秋誅亂賊之法意指呂師孟朝廷不

能行至是文煥云丞相何故罵煥以亂賊子謂國
家不幸至今日汝為罪魁汝非亂賊而誰三尺童
子皆罵汝何獨我哉煥云襄守六年不救子謂力
窮援絕死以報國可也汝愛身惜妻子既負國又
隕家聲今合族為逆萬世之賊臣也孟在傍甚忿
直前云丞相上疏欲見殺何為不殺取師孟子謂
汝叔姪皆降北不族滅汝是本朝之失刑也更敢
有面皮來做朝士予實恨不殺汝叔姪汝叔姪能

殺我我為大宋忠臣正是汝叔姪周全我我不
怕孟語塞諸首皆失色動顏索多以告巴延巴延
吐舌云文丞相心直口快男子心索多間云丞相
罵得呂家好以此見諸首亦不容之

不拚一死報封疆忍使湖山牧虎狼當日本為妻子計
而今何面見三光

虎頭牌子織金裳北面三年蟻夢長借問一門朱與紫
江南幾世謝君王

金
卷十八
梟獍何堪共勸酬衣冠塗炭可勝羞袖中若有擊賊笏
便使兇渠面血流

麟筆嚴於首惡書我將口舌擊奸諛雖非周勃安劉手
不愧當年產祿誅

信雲父

信世昌字雲父東平府人公子無忌之後嘗為元
太常丞北方之儒也隸索多索多使之來伴子雲
父知古今識道理可語中原遺黎甚惓惓於本朝

頗輸情焉作詩見贈內兩句云宗廟有靈賢相出羣
黎無害大皇明京師為之傳誦雲父大意以為高
麗地方數千里昨喪其半遂稱藩大元喜其不拒
并侵疆歸之今傳世如故大宋衣冠正統非高麗
比北必不敢無禮於吾社稷也雲父念本朝亦願
望之辭

東魯遺黎老子孫南方心事北方身幾多江左腰金客
便把君王作路人

信雲父好為詩而辭極俚近一日問予詩法予因
舉宮詞數章比興悠長意在言外雲父恍有所得
明日袖出一絕云東風吹落殘花殘英猶戀枝莫怨
東風惡花有再開時言予之不忘王室而王室之
必中興也雲父居近關里漸染孔氏之遺風故其
用意深厚而超悟如此

肯從悟室課兒書
嚙雪風流却減渠
我愛信陵冠帶意
任教句法問何如

則堂

敵入京城賈餘慶迎逢賣國既令學士降詔俾天下州郡歸附之又各州付一省劄惟樞密則堂家先生鉉翁於省劄上不肯押號吳丞相堅號老儒不能自持一切惟賈餘慶之命其愧則堂甚矣程鵬飛見則堂不肯奉命堂中作色欲縛之去則堂云中書省無縛執政之理歸私廳以待執彼竟不敢誰何予在營以忠義孤立聞其事以自壯云

山河四塞舊甌金藝祖高宗實鑒臨一日盡將輸敵手
何人賣國獨甘心

中書堂帖下諸城搔首庭中號獨清此後方知樞密事
從今北地轉相驚

思蒲塘陳

揚旌來冉冉捲旆去堂堂恨我飛無翼思君濟有航
麟還共處熊虎已何鄉南國應無恙中興事會長

思方將軍

始興溪子下江淮曾為東南再造來如虎如熊今固在
將軍何處上金臺

索多

索多為予言大元將興學校立科舉丞相在大宋
為狀元宰相今為大元宰相無疑丞相常說國存
與存國亡與亡這是男子心天下一統做大元宰
相是甚次第國亡與亡四箇字休道予哭而拒之
索多常恐予之伏死節也

虎牌氈笠號公卿不直人間一唾輕但願扶桑紅日上
江南匹士死猶榮

二王

索多蒙古岱一日問度宗幾子答曰三子問皇帝
是第幾子答曰第二子立嫡也問第一子三子封
王乎曰一吉王一信王問今何在曰大臣護之去
矣駭云去何處曰非閩則廣宋疆土萬里儘有世
界在云既是一家何必遠去曰何為恁地說宗廟

社稷所關豈是細事北朝若待皇帝好則二王為人臣若待皇帝不是即便別有皇帝出來二酋為之愕眙不能對

一馬渡江開晉土五龍夾日復唐天內家苗裔真隆準
奠鼎從知萬億年

氣槩

索多一日問予何以去平江予曰有詔趣入衛問
予兵若干予對五萬人喟然嘆曰天也使丞相在

平江必不降予問何以知之云相公氣槩如何肯
降但累城內百姓予謂果廝打亦未見輸贏唆都
大笑

氣槩如虹俺得知留吳那肯豎降旗北人不解欺心語
正恐南人作淺窺

使北

北兵入城既却詔書布告天下州郡各使歸附又
逼天子拜表獻土左丞相吳堅右丞相賈餘慶樞

密使謝堂參政家鉉翁同知劉岳五人捧表北庭
號祈請使賈幸國難自詭北人氣燄不可向邇謝
無識附和吳老儒畏怯不能爭劉狎邪小人方乘
時取美官揚揚自得惟家公非願從者猶以為趙
祈請意北主或可語冀一見陳說為國家有一綫
故引決所未忍也五人之行皆出北意吳初以老
病求免且已許之故表中所述賈謝家劉四人吳
不與焉二月初八日四人登舟忽巴延趣予與吳

丞相俱入北予不在使者列是行何為蓋驅逐之
使去耳予陷在難中無計自脫初九日與吳丞相
同被逼脅黽就船先一夕予作家書處置家事
擬翌日定行止行則引決不為偷生及見吳丞相
家參政吳殊無徇國之意家則以為死傷勇祈而
不許死未為晚予以是徘徊隱忍猶冀一日有以
報國惟是賈餘慶兇狡殘忍出於天性密告巴延
使啟北庭拘予於沙漠彼則賣國佞北自謂使畢

即歸愚不可言也謝堂已宿謝村初九日忽駕舟
而回或謂索多為之地已延得賄而免堂曲意奉
北可鄙惡尤多詩記其事

自說家鄉古相州白麻風旨出狂酋中書畫出降元表
北渡黃河衣錦遊

賈

至尊馳表獻燕城肉食那知以死爭當代老儒居首揆
殿前陪拜率公卿

吳

江南浪子是何官只當空廬雜劇看撥取公卿如糞土

沐猴徒自辱衣冠 劉

公子方張奉使旗行行且尼復何為似聞傾盡黃金塢
辛苦平生只為誰 謝

廷爭堂堂負直聲飄零沙漠若為情程嬰存趙真公志
賴有忠良壯此行 家

初脩降表我無名不是隨班拜發人誰遣附庸祈請使
要教北國識忠臣

客子漂搖萬里程北征情味似南征小臣事主寧無罪

只作幽州謫吏行

使旃盡道有回期
獨陷羈臣去牧羝
中爾含沙渾小事
白雲飛處楚天低

杜架閣

天台杜澣字貴卿號梅壑糾合四千人欲救王室
當國者不知省正月十三日見子於西湖上予嘉
其有志頗獎異之十九日客贊予使北梅壑斷斷
不可客逐之去予果為北所留後二十日驅予北

行諸客皆散梅壑憐予孤苦慨然相從天下義士
也朝旨特改宣教郎除禮兵架閣文字

仗節辭王室悠悠萬里轅諸君皆雨別一士獨星言啼
鳥亂人意落花銷客魂東坡愛巢谷頗恨晚登門

昔超魏公子今事霍將軍世態炎涼甚交情貴賤分黃
沙揚暮靄黑海起朝氛獨與君攜手行吟看白雲

聞雞

自入北營未嘗有雞唱因泊謝村始有聞是夜幾

與梅壑逃去二更遣劉百戶二十人擁一舟來
逼下船遂不果

軍中二十日此夕始聞雞塵暗天街靜沙長海路迷銅
駝隨雨落鐵騎向風嘶曉起呼詹尹何時脫蒺藜

命裏

二月初十夜為劉百戶者所迫中原人尚可告語
也賈餘慶語特穆爾曰文丞相心腸別翌日早特
穆爾自駕一舟來令命裏千戶押予上船凶徒嚇

人見者莫不流涕命裏高鼻而深目面毛而多鬚
回回人也

熊罷十萬建行臺單騎誰教免胄來一日捉將沙漠去
遭逢碧眼老回回

留遠亭

十一日宿處岸上有留遠亭北人然火亭前聚諸
公列坐行酒賈餘慶有名風子湍口罵坐毀本朝
人物無遺者以此獻佞敵惟疊疊笑劉岳數奉以

淫褻為北所薄文煥云國家將亡生出此等人物
予聞之悲憤不已及是諸酋專以為笑具於舟中
取一村婦至亭中使薦劉寢據劉之交坐諸酋又
嗾婦抱劉以為戲衣冠掃地殊不可忍則堂尤憤
疾云

甘心賣國罪滔天酒後猖狂詐作顛把酒逢迎酋長笑
從頭罵坐數時賢賈

落得稱呼浪子劉樽前百媚佞旃裘當年鮑老不如此

留遠亭前犬也羞劉

平江府

予過吳門感念悽愴向使朝命不令入衛嚴速予
以死守不死於是即至今存可也予托病卧舟中
舊吏三五人來遺民間吾經過無不垂涕者舟到
一時頃即解纜夜行九十里北似防我云

樓臺俯舟楫城郭滿干戈故吏歸心少遺民出涕多鳩
居無鵲在魚網有鴻過使遂睢陽志安危今若何

無錫

己未予攜弟壁赴廷對嘗從長江入裏河趨京口
回首十八年復由此路是行驅之入北感今懷昔
悲不自勝

金山冉冉波濤雨錫水泯泯草木春二十年前曾去路
三千里外作行人英雄未死心為碎父老相逢鼻欲辛
夜讀程嬰存趙事一回惆悵一沾巾

弔五木

予初以朝廷遣張全將淮兵二千救常州以其為
淮將必經歷老成遂遣朱華將三千人從之張全
無統馭之材自為畦町十月二十六日提淮軍自
往橫林設伏虞橋北兵至麻士龍死之張全不救
走回五木五木乃朱華軍所駐如掘溝塹設鹿角
張全皆不許朱華措置殊不曉其意二十七日北
兵薄朱華自辰至未朱華與廣軍與之對北兵自
路塘直來死於水者不可勝計至晚北兵繞山後

薄贛軍尹玉當之曾全胡遇謝雲曾玉先遁走尹
玉死焉張提軍隔岸不發一矢有利灾樂禍之心
吾軍渡水挽張全軍船張全令諸軍斷挽船者之
指於是溺死者甚衆張全并宵遁惟尹玉殘軍五
百人與北兵角一夕殺北兵及馬委積田間質明
止有四人得歸今易崇尚存嗚呼使此戰張全稍
施援手可以大勝提一夫無意而事遂闕宗社嗚
呼天哉余初欲先斬張全然後取一時敗將並從

軍法以張全為朝廷所遣請於都督乃宥張全使
自贖予遂不及行法後詣餘杭發京師姑取曾全
以徇衆而噬臍多矣過五木弔戰場為之流涕不
可禦續聞張全者淮東之債將也昨隨許文德復
清河兵已入城張全鳴金散衆許不敢戰斬將自
縛解赴制閫李公以使過期之得不死予不知受
其誤其免罪又出於第二次僥倖卒為降賊可歎
恨云

首赴勤王役成功事則天富平名委地好水淚成川我
作招魂想誰為掩骼緣中興須再舉寄語慰重泉

哭尹玉

尹玉江西憲司將官五木之戰手殺七八十人其
麾下與北兵戰併死無一降者朝廷贈濠州團練
使立廟與二子官承節卽下江西安撫使撥賜良
田二百畝其間以捕寇死者何限惟玉得其死所
恤典非細哀榮備焉

團練濠州廟贛川官其二子賜良田西臺捕逐多亡將
還有焚黃到墓前

常州

常州宋睢陽郡也北兵憤其堅守殺戮無遺種死
者忠義之鬼哀哉

山河千里在煙火一家無壯甚睢陽守冤哉馬邑屠蒼
天如可問赤子果何辜唇齒提封舊撫膺三嘆吁

鎮江

至京口予以十八年曾自鎮江趨京今自京趨鎮江俯仰感嘆為之流涕

鐵甕山河舊金甌宇宙非昔隨西日上今見朔塵飛豪傑非無志功名自有機中流懷士稚風雨濕雙扉

渡瓜洲

諸祈請使十八日至鎮江府阿珠在瓜洲即請十九日渡江至則鮮腆倨傲令人裂眦諸公皆與之語予始終無言後得之監守者云阿珠言文丞相

不語肚裏有倭儼彼知吾不心服也

跨江半壁閱千帆虎在深山龍在潭當日本為南制北
如今翻被北持南

眼前風景異山河無奈諸君笑語何坐上有人正愁絕
彼中便道是倭儼

弔戰場

連年淮水上死者亂如麻魂魄丘中土英雄糞上花士
知忠厥主人亦念其家凶德寧堪久皇天應不差

回京口

予回京口幸得間問舟為脫去計連日不如志賦
是詩

早作田文去終無蘇武留偷生寧伏劍忍死欲焚舟逸
驥思超乘飛鷹志脫鞴登樓望江上日日數行艘

思小村劉

春雲慘慘兮春水漫漫思我故人兮行路難君轅以南
兮我轅以北去日以遠兮憂不可以終極蹇予馬兮江

臯式燕兮以遊遨念我平生兮思君鬱陶在師中兮豈
造次之可離忠言不聞兮思君忸怩毫釐之差兮天壤
易位駟不及舌兮臍不可噬思我故人兮懷我親懷我
親兮思故人懷哉懷哉不可忍兮不如速死慨百年之
未半兮胡中道而遄止魯連子兮義不帝秦負玄德兮
關不名為人委骨草莽兮時迺天命自古孰無死兮首
丘為正我行我行兮夢寐所思故人望我兮胡不歸胡
不歸

沈頤家

予回京口北人款之府中予不得離岸上得沈頤
家坐卧固不意予為逃計也

孤舟霜月迴曉起入柴門斷岸行簪影荒畦落履痕江
山渾在眼宇宙付無言昨夜三更夢春風滿故園

脫京口

二月二十九夜予自京口城中間道出江許登舟
泝金山走真州其艱難萬狀各以詩記之

定計難

予在京城外日夜謀脫不得間者謝村幾去至平江欲逃又不果至鎮江謀益急議趨真州杜架閣許與帳前將官余元慶實與謀元慶真州人也杜架閣與予云事集萬萬幸不幸謀泄皆當死死有怨乎予拍心自誓云死靡悔且辨七首挾以俱事不濟自殺杜架閣亦請以死自効於計遂定

南北人人苦泣岐壯心萬折誓東歸若非所案判生死

夜半何人散笑圍

謀人難

杜架閣如顛狂人醉遊於市遇有言本朝而感憤
追思者即捐金與之密告以欲遁之謀無不願自
効以無舟而輟前後毋慮十數其不謀泄真幸耳
一片歸心似亂雲逢人時漏話三分當時若也私謀泄
春夢悠悠郭璞墳

踏路難

京口無城通衢多隘去江尚十里偶得一老校馬
引間道出三數巷即荒涼野走至江岸路頗近若
使不知間道只行市井正路無可出之理

烟火連甍鉞甕關要尋間道走江干何人肯為將軍地
北府老兵思漢官

得船難

北船滿江百姓無一舟可問杜架閣與人為謀皆
以無船長嘆而止是後余元慶遇其故舊為北管

船遂密叩之許以承宣使銀千兩其人云吾為宋
救得一丞相回建大功業何以錢為但求批帖為
他日超承之證後授以一批帖約除廉車乃強委
之白金義人哉使吾無此一遭遇已矣

經營十日苦無舟慘慘推心淚血流漁父疑為神物遣
相逢楊子大江頭

給北難

自至鎮江即謀船不可得至二月二十九日方得

之喜甚是午催過瓜洲賈餘慶諸人皆渡矣惟予
與吳丞相在河次得報最遲於是托故以來日同
吳丞相渡江幸而彼不見疑驅迫稍緩是夕遂逃
若非得此一紿從前經營皆枉用心惟有死耳豈
不痛哉

百計經營夜負舟倉皇誰趣渡瓜洲若非行紿成宵遁
哭死界河天地愁

定變難

老兵即踏路之人杜架閣日與之飲顏情甚狎是
夜逃者十二人二人坐舟猶有十人作一陣走恐
出門太冗則事易知覺路必過老兵之門於是遣
三人先就老兵家伺過門同遁忽老兵中變醉不
省其妻詰問之欲喚四鄰發覺一人亟走報杜架
閣亟呼老兵出來直至吾前藏之帳中三人者同
時而回老兵酒醒以銀三百星係其腰云事至與
之遂至二更引路而行是舉垂成幾為老兵老嫗

所誤全得杜架閣機警故狙詐之將作敵者又隨
作使耳危哉危哉

老兵中變意差池倉卒呼來朽索危若使阿婆真一吼
目生隨後悔何追

出門難

元始款諸宰執於鎮江府惟吳丞相以病不離舟
予為遁計宿府治一夕即托故還裏河舟中彼亦
不之疑予遂於河近得沈頤家坐卧初彼分遣諸

酋監諸宰執從予者曰王千戶狼突可惡相隨上
下不離頃刻予在沈頤家彼亦同卧席前後是夜
予醉居停主人復醉王千戶者伺其寢熟啟門而
出使微有知覺吾事殆哉

羅刹盈庭夜色寒人家燈火半闌珊夢回跳出鐵門限
世上一重人鬼關

出巷難

敵遣兵齟巷禁夜不得往來先是有一酋忽入沈

頭家子問何人劉百戶問何職管夜禁問官勾當
何如曰官燈提照往來從便杜架閣聞之即隨劉
百戶出強與之好已而約為兄弟拉之飲于妓舍
杜強劉宿劉俾杜歡杜云我隨丞相在此夜安置
後方可出怕禁夜耳噯送爾燈噯送小番隨着不
妨事杜遂約後夕果如約予變服色隨杜出諸巷
皆不呵問杜至人家漸盡處即以銀與小番約之
便歸來日候於某所小番方十五六歲無知於是

得遁

不時徇鋪路縱橫小隊戎衣自出城天假漢兒燈一炬
旁人只道是官行

出隘難

敵於市井盡處設險以十餘馬欄路予等至隘所
馬驚意甚恐幸北軍皆睡因得脫

袖攜匕首學銜枚橫度城闕馬欲猜夜靜天昏人影散
北軍鼾睡正如雷

候船難

予先遣二校坐舟中密約待予甘露寺下及至船
不知所在意窘甚交謂船已失約奈何予攜匕首
不忍自殘甚不得已有投水耳余元慶褰裳涉水
尋一二里許方得船至各稽首以更生為賀

待船三五立江干眼欲穿時夜漸闌若便長年期不至
江流便作汨羅看

上江難

予既登舟意汭流直上他無事矣乃不知江岸皆
北船迷亘數十里鳴榔唱更氣燄甚盛吾船不得
已皆從北船邊經過幸而無問者至七里江忽有
巡者喝云是何船梢答以河鮐船巡者大呼云歹
船歹者北以是名反側紆細之稱巡者欲經船前
適潮退閣淺不能至是時舟中皆流汗其不來僥
倖耳

蒙衝兩岸夾長川鼠伏孤篷掉向前七里江邊驚一喝

天教潮退閣巡船

得風難

予方為七里巡船所驚忽有聲如人哨齒甚清麗
船梢立船頭拜且禱曰神道來送問何神曰江河
田相公也即得順風送上

空中哨響到孤篷盡道江河田相公神道自來扶正直
中流半夜一帆風

望城難

初得順風意五更可達真州城下風良久遂靜天
明尚隔真州二十餘里深恐敵船自後追躡又懼
有哨騎在淮岸一時憂迫不可言在舟之人盡力
搖槳撐篙可牽處沿岸拽纜然心急而力不逮既
望見城又不克進甚矣脫虎口之難

自來百里半九十望見城頭路愈長薄命只愁追者至
人人搖槳渡滄浪

上岸難

真州濠與江通然潮長舟方可到城是日泊五里
遂上岸城外荒涼寂無人影四平如掌一無關防
幸而及城門無他慮當行路時盼盼回首惟恐有
追騎之猝至既入城門聞昨日早晨哨馬正到五
里頭時三月朔云

岸行五里入真州城外荒荒鬼也愁忽聽路人嗟嘆說
昨朝哨馬到江頭

入城難

既至真州城下問者羣望告以文丞相在鎮江走
脫徑來投奔城子諸將校皆出即延入城苗守迎
見語國事移時感憤流涕即款之州治中住清邊
堂然後從者之始至也引至直司搜身上軍器既
知無他然後見信其闢防之嚴密如此向使恐疑
橫於胸中閉門不受天地茫茫何所歸嘻危哉
輕身漂泊入鑿江太守欣然為避堂若使閉城呼不應
人間生死路茫茫

真州雜感

予既脫虎口至真州喜幸感嘆靡所不有各係之以七言自正月二十羈縻北營至二月二十九一夜京口得脫首尾恰四十日一入真州忽見大宋衣冠如流浪人乍歸故鄉不意重覩天日至此四十義娥落虎狼今朝騎馬入真陽山川莫道非吾土一見衣冠是故鄉

予入真州聚觀者夾道如堵東坡云被天津橋上

人看殺久無此境界矣

聚觀夾道捲紅樓奪得南朝一狀頭將謂燕人騎屋看
而今馬首向真州

京口船與梢人北人皆有籍予所得船乃並緣北
船販私鹽者船與二水手皆籍所不及予是以得
濟豈非天哉

賣却私鹽一舸回天教壯士果安排子胥流向江南去
我獨倉皇夜走淮

予以夜遁北人來早方覺而吾已在汶上矣

便把長江作界河負舟半夜泝煙波明朝方覺田文去
追騎如雲可奈何

予逃之明日北人大索民間累南人甚多然予逝
矣不可得矣

十二男兒夜出關曉來到處捉南冠博浪力士猶難覓
要覓張良更是難

三月朔旦予在真州城內賈餘慶在瓜洲皆淮境

也而南北分焉哀哉

我作朱金沙上游諸君冠蓋渡瓜洲淮雲一片不相隔
南北死生分路頭

諸宰執自京城陷後無復遠畧北人之驅去皆俯
首從之莫有謀自拔者予犯死逃歸萬一有及國
事志亦烈矣

公卿北去共低眉世事興亡付不知不是謀歸全趙璧
東南那箇是男兒

天下趙

予至真苗守再成為予言近有樵人破一樹樹中
有生成三字曰天下趙亟取木視之果然木一丈
二尺圍其字青而深半樹解揚州半樹留真州三
字瞭然不可磨也以此知我朝中興天必將全復
故疆真州號迎鑾藝祖發迹於此非在天之靈所
為乎

皇王著姓復炎圖此是中興受命符獨向迎鑾呈瑞字

為言藝祖有靈無

議糾合兩淮復興

予至真州守將苗再成不知朝信於是數月矣問
予京師事慷慨激烈不覺流涕已而諸將校諸幕
皆來俱憤極不自堪兩淮兵力足以復興惜天使
李公怯不敢進而夏老與淮東薄有嫌隙不得合
從得丞相來通兩淮脉絡不出一月連兵大舉先
去敵巢之在淮者江南可傳檄定也予問苗守計

安出苗云先約夏老以兵出江邊如向建康之狀以牽制之此則以通泰軍義打灣頭以高郵淮安寶應軍義打楊子橋以揚州大軍向瓜洲某與趙刺史孟綿以舟師直擣鎮江並同日舉彼不能相救灣頭楊子橋皆汳江脆兵守之且怨彼王師至即下聚而攻瓜洲之三面再成則自江中一面薄之雖有智者不能為之謀此策既就然後淮東軍至京口淮西軍入金城彼在兩浙無路得出其帥

可生致也予喜不自制不圖中興機會在此即作
李公書次作夏老書苗各以覆帖副之及欲予致
書戎帥及諸郡并曰此意予已作朱渙姜才蒙亨
等書諸郡將以次發時與議者皆踴躍有謂李不
能自拔者又有謂朱渙姜才各做起來李不自由
者又有謂李恨不得脫重負何幸有重臣輔之予
既遣書盼盼焉望報天之欲平治天下則吾言庶
幾不朽鑿乎

清邊堂上老將軍南望天家雨濕巾為道兩淮兵定出
相公同作軟盟人

揚州兵了約廬州某向瓜洲某鷺洲直下南徐侯自管
皇親刺史統千舟

南八空歸唐壘陷包胥一出楚疆還而今廟社存亡決
只看元戎進退間

出真州

予既為李制所逐出真州艱難萬狀不可殫紀痛

哉

予至真州第三日苗守約云早食後看城子予欣然諾之有頃陸都統來導予至小西門城上閑看未幾王都統至迤邐出城外王忽云有人在揚州供得丞相不好出制司小引視之乃脫回人供營中所見云有一丞相差往真州賺城王執右語不使予見予方歎惋間二都統忽鞭馬入城小西門閉矣不復得入彷徨城外不知死所

早約戎裝去看城
聯鑣壕上嘆風塵
誰知闕出西門外
憔悴世間無告人

制使遣一提舉官至真州
疑予為敵用
苗守貳於予云
決無宰相得脫之理
縱得脫亦無十二人得
同來之理
何不以矢石擊之
乃開城門放之使入
意使苗守殺予以自明
哀哉

揚州昨夜有人來
誤把忠良按劍猜
怪道使君無見解
城門前日不應開

制使欲殺我苗守不能決將信將疑而憐之之意
多也

瓊花堂上意茫然志士忠臣淚徹泉賴有使君知義者
人方欲殺我猶憐

予幸脫身至真州即議糾帥兩淮以圖恢復制使
乃疑予為敵用欲見殺江南與敵營皆知予為忠
義而兩淮不予信予平生仕宦聲迹比比不曾至
淮天地茫茫與誰語哉

秦庭痛哭血成川
翻訝中行背可鞭
南北共知忠義苦
平生只少兩淮緣

予少時曾遊真州至是十八年矣初望糾合復興
為國家辦大事乃不為制臣所容天乎哀哉

一別迎鑾十八秋
重來意氣落旄頭
平山老子不收拾
南望端門淚雨流

始見制臣小引脩脫回人朱七二等供云有一丞
相往真州賺城予頗疑北有智數見予逃後遣人

詐入揚州供吐以行反間既而思之揚州遣提舉
官來真州見害乃三月初二日午前發予以二月
晦夕逃朔旦敵方覺然不知走何處是日便遣人
詐入揚州殆無此理看來只是吾書與苗守覆帖
初二日早到制使不暇深省一槩以為奸細而欲
殺之哀哉何不審之甚乎

天地沉沉夜泝舟鬼神未覺走何州明朝遣問應無是
莫恐元戎逐客不

予在門外久之忽有二人來曰義兵頭目張路分
徐路分也予告以故二人云安撫傳語差某二人
來送看相公去那裏予云必不得已惟有去揚州
見李相公路分云安撫謂淮東不可往予謂夏老
素不識且淮西無歸路予委命於天只往揚州二
路分云且行且行良久有五十人弓箭刀劍來隨
二路分騎馬以二馬從予予與杜架閣連轡而發
人人爭勸走淮西莫犯翁翁按劍疑我問平山堂下路

忠臣見誅有天知

予在小西門外皇皇無告同行杜架閣仰天呼號
幾赴壕死從者皆無人色莫知所為予進不得入
城城外不測有兵露立荒垆又乏飲食予心自念
豈予死於是乎為之踟躕心脅如割後得二路分
從行苗守又遣衣被包複等來還遂之揚州是日
上巳日也

千金犯險脫羈囚誰料南冠反見仇記取小西門外事

年年上已哭江頭

二路分引予行數里猶望見真州城五十兵忽齧
刀於野駐足不行予自後至二路分請下馬云有
事商量景色可駭予下馬問云商量何事云行幾
步行稍遠又云且坐且坐予意其殺我於此矣與
之立談二路分云今日之事非苗安撫意乃制使
遣人欲殺丞相安撫不忍加害故遣某二人來送
行今欲何往予云只往揚州更何往彼云揚州殺

丞相奈何曰莫管信命去二路分云安撫今送往
淮西予云淮西對建康太平池州江州皆敵所在
無路可歸只欲見李制使若能信我尚欲連兵以
圖恢復否則即從通州路道海還闕二路分云李
制使已不容不如只在諸山寨中少避予云做什
麼合煞生則生死則死決於揚州城下耳二路分
云安撫見辦船在岸下丞相從江行或歸南歸北
皆可予驚曰是何言歟如此則安撫亦疑我矣二

路分見予辭真確乃云安撫亦疑信之間令某二人便宜從事某見相公一箇恁麼人口口是忠臣某如何敢殺相公既真箇去揚州則某等部送去乃知苗守亦主張不過實使二路分覘予語言趨向而後為之處使一時應酬不當被害原野誰復知之痛哉痛哉時舉所攜銀一百五十兩與五十兵且許以至揚州又與十兩二路分則許以分賜金百兩遂行

荒郊下馬問何之死活元來任便宜不是白兵生眼孔
一團冤血有誰知

二路分既信予忠義與予中路言真州備判司行
下有安民榜云文相公已從小西門外押出州界
去訖為之嗟嘆不已嗚呼予之不幸乃至於斯其
不死於兵豈非天哉

戎衣嘖嘖嘆忠臣為說城頭不識人押出相公州界去
真州城裏榜安民

杜架閣幾赴壕以救免一行人皆謂當死於真州城下矣後得二路分送行惟恐有敵哨追之危哉危哉

有客倉皇欲赴壕一行性命等鴻毛白兵送我揚州去惟恐北軍來捉逃

二路分所引路乃淮西路既見予堅欲往揚州遂復取揚州路時天色漸晚張弓挾矢一路甚憂疑指某處瓜洲也又前某處楊子橋也相距不遠既

暮所行皆敵境惟恐彼遣人伏路上寂如銜枚使
所過彼有數騎在焉吾等不可逃矣

瓜洲相望隔山椒煙樹光中揚子橋夜靜銜枚莫輕語
草間惟恐有鷗鴉

是日行至暮二路分先辭只留二十人送揚州二
十人者又行十數里勒取白金亦辭去不可挽揚
州有販鬻者以馬載物夜竊行於途曰馬埽子二
十人者但令隨馬埽子即至揚州西門予一行如

盲悵悵然行嗚呼客路之危難如此

真州送駿已回城暗裏依隨馬埭行一陣西州三十里
摘星樓下打初更

至揚州

予至揚州城下進退維谷其傍徨狼狽之狀以詩
志其槩

予夜行銜枚至揚州西門憊甚有三十郎廟僅存
墻堦屋無矣一行人皆枕藉於地時已三鼓風寒

露濕悽苦不可道

此廟何神三十郎問郎行客忒琅璫荒堦枕藉無人問
風露滿堂清夜長

揚州城中打四更一行人遂入近城西門坐漫地
上候啟門者無慮百數城上問何人從他人應答
予等莫敢語恐聲音不同即眼生隨後

誰鼓鼙鼙入四更行行三五入西城隔壕唱問無人應
怕恐人來捉眼生

予出真州實無所往不得已趨揚州猶冀制臣之
或見諒也既至城下風露淒然聞鼓角有殺伐聲
傍徨無以處

悵悵乾坤靡所之平山風露夜何其翁翁豈有甘心事
何故高樓鼓角悲

制臣之命真州也欲見殺若叩揚州門恐以矢石
相加城外去揚子橋甚近不測又有哨進退不可
城上堦登按劍看四郊游騎遶團團平生不解揚朱泣

到此方知進退難

杜架閣以為制臣欲殺我不如早尋一所逃哨一
日却夜趨高郵求至通州渡海歸江南或見二王
伸報國之志徒死城下無益

吾戴吾頭向廣陵仰天無告可憐生爭如負命投東海
猶會乘風近玉京

金路分謂出門便是哨五六百里而後至通州何
以能達與其為此受苦而死不如死於揚州城下

不失為死於南且猶意使臣之或者不殺也

海雲渺渺楚天頭滿路烟塵不自由若使一朝俘上去
不如制命死揚州

予方未知所進退余元慶引一賣柴人至云相公
有福相公有福問能導至高沙否曰能曰何處可
暫避一日曰儂家可曰此去幾里曰二三十里曰
有哨否曰數日不一至曰今日哨至如何曰看福
如何耳

路傍邂逅賣柴人為說高沙可問津此去儂家三十里
山坳聊可避風塵

予從金之說恐制臣見殺從杜之說恐北騎見捕
莫知所決時曉色漸分去數步則金一邊來牽住
回數步則杜一邊又來拖行事之難從違未有如
此之甚者

且行且止正依違髣髴長空曙影微從者倉皇心緒急
各持議論泣牽衣

同行通十二人行止未決余元慶李茂吳亮蕭發
遽生叛心所懷白金各一百五十星上下竟攜以
走

問誰攫去橐中金僮僕雙雙不可尋折節從今交國士
死生一片歲寒心

予危急中隨行四人背負而逃外既顛隕內又饑
困行數十步喘甚不能進倒荒草中扶起又行如
此數十而天曉矣

顛崖一陷落千尋奴僕偏生負主心
饑火相煎疲欲絕
滿山荒草晚沉沉

予不得已去揚州城下隨賣柴人趨其家而天色
漸明行不能進至十五里頭半山有土圍一所舊
是民居毀蕩之餘無椽瓦其間馬糞堆積時惟恐
敵有望高者見一隊人行即來追逐只得入此土
圍中暫避為謀拙甚聽死生於天矣

戴星欲赴野人家曙色紛紛路愈賒倉卒只從山半住

頽垣上有白雲遮

既入土圍中四山閒然無一人影時無米可飯有
米亦無煙火可炊懷金無救也哀哉

路逢敗屋作鷄棲白屋荒荒鬼哭悲袖有金錢無米糴
假饒有米亦無炊

土圍糞穢不可避但掃淨數尺地以所攜衣服貼
襯地面睡起復坐坐起復睡日長難過情緒奄奄
哀哉

掃退蜣螂枕敗牆一朝何止九回腸睡餘捫虱沉沉坐
偏覺人間白日長

北軍惟午前出哨午後各歸若是日起程至午後
懽曰今日得命矣忽聞人聲喧啾甚自壁窺之乃
敵騎數千自東而西於是追咎不死於揚州城下
而被捉於此苦矣苦矣時大風忽起黑雲暴興數
點微雨下山色昏冥若有神功來救助也

飄零無緒嘆途窮搔首踟躕日已中何處大聲似潮沂

金史四
卷十一
黑雲驟起滿山風

數千騎隨山而行正從土圍後過一行人無復人
色傍壁深坐恐門外得見若一騎入來即無噍類
矣時門前馬足與箭筒之聲歷落在耳只隔一壁
幸而風雨大作騎兵徑去危哉危哉哀哉哀哉

畫闌萬騎忽東行
鼠伏荒村命羽輕
隔壁但聞風雨過
人人顧影賀更生

予與杜架閣及金應張慶夏仲呂武王青鄒提共

八人在土圍中時已過午謂哨不來山下一里有
古廟廟中有丐婦居之廟前有井遂遣呂武鄒捷
下山汲水意或可以得米菜少救饑餓不料哨至
二人首被獲二人解所腰白金近三百兩悉以與
之敵受金得不殺及哨過二人方回相向哀泣又
幸性命之苟全

青衣山下汲荒泉道遇腥風走不前向晚歸來號且哭
游軍只為解腰纏

早從賣柴人行不能前遂至於土園中約賣柴人
入城糴米救性命云不奈何忍飢一日城中衙晡
後方開門米至則黃昏矣是日敵數百騎薄西城
於是門不開賣柴人竟不得出予等饑窘失措又
以土園中露天不可睡卧於是下山投古廟中與
丐婦人同居焉

眼穿只候賣柴回今日堡城門不開糴米已無消息至
黃昏惆悵下山來

既至廟中坐未定忽有人攜挺至良久三四人陸續來吾意不免矣乃知其人自城中來夜討柴來早入城赴賣無惡意也數人煮糝羹出其餘以遺我有未冠者一夕於庭中燒火照明諸樵亦不睡予等且困且睡是不可言

既投古廟覓藜羹三五樵夫不識名僮子似知予夢惡生柴燒火到天明

予等飢甚樵者飲食輒乞其餘破廟何所風露淒

然僅存一身猶不自保哀哉

苦作江頭乞食翁一層破廟五更風眼前境界身何許
始悟人間萬法空

予見諸樵夫幸而可與語告以患難厚許之使導
往高沙賴其欣然見從謂此處不是高沙路方駐
堡城北門賈家庄少駐一日却為入城糴米買肉
以救兩日之饑又僱馬辦乾糧以備行役於是五
更隨諸樵夫往焉時樵夫知予無聊又有所攜使

萌不肖心得財豈不多於所許淮人依本分感激
豈亦有天意行其間乎

樵夫偏念客途長肯向城中為裹糧晚指高沙移處泊
司徒廟下賈家庄

賈家庄

予初五日隨三樵夫黎明至賈家庄止土圍中卧
近糞壤風露淒然時枵腹已經兩夕一日半懇三
樵夫入城糴米買肉至午而得食是夜僱馬超高沙

行邊無鳥雀卧處有腥臊露打鬚眉硬風搜顴頰高流
離外顛沛饑渴內煎熬多少偷生者孤臣嘆所遭

揚州地分官

初五至晚地分官五騎咆哮而來揮刀欲擊人凶
燄甚於寇亟出濡沫方免毒手急令離地分去告
以入城云入城必被殺幸而脫北方之難不意困
折於我土地天地雖大無所容身哀哉

五騎馳來號徼巡咆哮按劍一何嗔金錢買命方無語

何必豺狼罵北人

便當縞素駕戎車畏賊何當畏虎如看取摘星樓咫尺
可憐城下哭包胥

思則堂先生

初四日予在桂公塘北騎數千東行莫知其故賈
家庄有樵夫云昨夜敵營甘泉西去城四十里有
白鬚老子設青罌愚飯於救生寺竈前稱南朝相
公問其何如曰面大而體肥以意逆之則堂家先

生也因知昨日敵驅奉使北去與其所掠老小輜
重偕行予雖不免顛踣道路較諸先生不以彼易
此也先生嘗云某四十規行矩步今日乃有此厄
流涕二十八字

白鬚老子宿招提香積厨邊供晚炊借問魚羹何處少
北風安得似南枝

高沙道中

予僱騎夜趨高沙越四十里至板橋迷失道一夕

行田畝中不知東西風露滿身人馬飢乏旦行霧
中不相辨須臾四山漸明忽隱隱見北騎道有竹
林亟入避須臾二十餘騎遶林呼噪虞侯張慶右
眼內中一箭項中二刀割其髻裸於地帳兵王青
縛去杜架閣與金應林中被獲出所攜黃金賂邏
者得免予藏處距杜架閣不遠北馬入林過吾傍
三四皆不見不自意得全僕夫鄒捷卧叢篠下馬
過踏其足流血總轄呂武親隨夏仲散避他所是

役也予自分必死當其急時萬竅怒號雜亂人聲
敵倉卒不盡得疑有神明相之馬既去聞其有焚
林之謀亟趨對山復尋叢篁以自蔽既不識路又
乏糧食人生窮蹙無以加此未幾呂武報敵騎已
還灣頭又如路邊鮎魚塢傳聞不盡信然他無活
策黽勉趨去僥倖萬一倉皇匍匐不能行先是自
揚州來有引路三人牽馬三人至是或執或逃僅
存其二二人出於無聊各操梃相隨有無禮之志

逡巡行路無可奈何至晚西忽遇樵者數人如佛
下降偶得一蘿以繩維之坐於蘿中雇夫六人更
迭負送馳至高郵城西天已曉不得渡常恐追騎
之奄至也宿陳氏店以茅覆地忍饑而卧黎明過
渡而心始安痛定思痛其涕如雨

三月初五日索馬平山邊疾馳趨高沙如走阪上圓夜
行二百里望望無人煙迷途呼不應如在盤中旋昏霧
腥且濕怒飈狂欲顛流漸在鬚髮塵沫滿橐鞬紅日高

十丈方辨山與川，冠行疾如鬼。忽在林之巔，誰家苦竹園。
其葉青，戔戔倉皇伏。幽篠生死信，天緣鐵騎俄四合。
鳥落無虛弦，遶林勢奔軼。動地聲喧闐，霜蹄破叢翳。
出入相貫穿，既無遁形術。又非縮地仙，猛虎驅羣羊兔魚。
落蹄筌一吏，射中目頸血。僅可濺一隸，縛上馬無路。
脫糾纏一廝，躡其足。吞聲以自全，一賓與一從。買命得金錢，
一倂與一校。幸不逢戈鋌，嗟予何薄命。寄身空且懸，
蕭蕭數竹側。往來度飛韉，遊鋒幾及膚。怒興空握拳，跬

步偶不見殘息忽復延當其戲迫時大風起四邊意者
相其間神物來蜿蜒更生不自意如病乍得痊須臾傳
火攻燃眉復相煎一行輒一跌奔命度平田幽篁便自
托仰天坐且眠晴曦正當晝焦腸火生咽斷嚙吸勺水
天降甘露鮮青山為我屋白雲為我掾彼草何荒荒彼
水何潺潺首陽既無食陰陵不可前便如失目魚一似
無足竄不見道傍骨委積萬有千魂魄親蠅蚋膏脂飽
烏鳶使我先朝露其事亦復然丈夫竟如此吁嗟彼蒼

天古人擇所安肯蹈不測淵奈何以遺體糞土同棄捐
初學蘇子卿終慕魯仲連為我王室故持此金石堅自
古皆有死義不污腥膻求仁而得仁寧願溝壑填秦客
載張祿吳人納伍員季布走在魯樊期托於燕國士急
人病個儻何拘攣彼人莫我知此恨付重泉鵲聲從何
來忽有吉語傳此去三五里古道方平行行人漸復出
哨馬覺已還回首下山阿七人相牽連東野御已窮而
復加之鞭跼足如移山攜持姑勉旃行行重狼顧常恐

追騎先揚州二游手面目輕且僂自言同脫虜波波口
流涎白日各持挺其來何翩翩奴輩殊無聊似欲為鷹
鷂逡巡不得避默默同寒蟬道逢採樵子中流得舟船
竹舂當安車六夫共賴肩四肢與百骸屈曲如枯槎路
人心為惻從者皆涕漣星奔不可止暮達城西阡飢卧
野人廬藉草為針氈詰朝從東渡始覺安且便人生豈
無難此難何迭遭重險復重險今年定何年聖世基岱
嶽皇風煽垓埏中興奮王業日月光重宣報國臣有志

悔往不可前臣苦不如死一死尚可憐堂上太夫人鬢
髮今猶玄江南昔卜宅嶺右今受廛首丘義皇皇倚門
望惓惓波濤避江介風雨行淮堧北海轉萬折南洋沂
孤騫周游大夫蠡放浪太史遷倘復游吾盤終當畊我
綿夫人生於世致命各有權慷慨為烈士從容為聖賢
稽首望南拜著此泣血篇百年尚哀痛敢謂事已遄

敵以高郵米贍濟維揚故自灣頭夜道騎截諸津
鮎魚塢其一予是夜若非迷途四更可達塢所當

一網無遺乃知一夕倉皇失道亦若有鬼神鼓動
於其間顛沛之餘雖幸不死何辜至此極也

至高沙

予倉皇至高沙驚魂靡定回思初四土圍中初五
竹林裏幾死於是使果不免委骨草莽誰復知之
江南自好築金臺何事風花墮向淮若使兩遭豺虎手
而今玉也有誰埋

予至高沙奸細之禁甚嚴時予以籬為轎見者憐

之又張慶血流滿面衣衫皆污人皆知其為遇寇
不復以姦細疑然聞制使有文字報諸郡有以丞
相來贖城令覺察關防於是不敢入城急買舟去

發高沙

曉發高沙卧一航平沙漠漠水茫茫舟人為指荒烟岬
南北今年幾戰場

平淮千里莽為丘墟自出高沙滿目空曠高郵水
與灣頭通下海陵入射陽過漣水皆其路也二月

六日城子河一戰我師大捷人指某處是戰場
城子河邊委亂尸河陰血肉更稀微大行南北燕山外
多少遊魂逐馬蹄

自至城子河積尸盈野水中流尸無數臭穢不可
當上下幾二十里無間斷乃敵以二月六日載奉
使柳岳洪雷震併輜重俱北稽家莊擊其前高郵
擊其腰敵大喪敗柳岳死焉洪雷震今在高郵見
說敵入江淮惟此戰我師大勝

一日經行白骨堆中流失拖為心摧海陵棹子長狼顧
水有船來步馬來

是日經行戰場四顧闐然棹人心恙長恐灣頭有
人出來又恐岸上有馬來趕正荒急間偶然拖拆
整拖良久危哉險哉

小泊稽莊月正弦莊官驚問是何船今朝哨馬灣頭出
正在青山大路邊

自高郵至稽家莊方有一團人家以水為寨統制

官稽聳其子德潤詣鄉舉其姪昌其館客莆田人
林希驥字千里林孔時字願學皆銳意於事功者
稽設醴甚至云今早報灣頭馬出到城子河邊不
與之相遇公福人也為之嗟嘆不置願學同德潤
送予至泰州

稽莊即事

乃心王室故日夜莽南征蹈險寧追悔懷忠莫見明鴈
聲連水遠山色與天平枉作窮途哭男兒付死生

泰州

予至海陵問程超通州凡三百里河道北與寇出沒其間真畏途也

羈臣家萬里天日鑒孤忠
心在坤維外身游坎窞中
長淮行不斷苦海望無窮
晚鵲傳佳耗通州路已通

卜神

通州三百里茅葦也還無鐵騎虎出沒
山鼯鬼嘯呼王陽懷畏道阮籍淚窮途
人物中興骨神明為國扶

旅懷

北去通州號畏途
固應孝子為回車
海陵若也容羈客
贖買菰蒲且寄居

天地雖寬靡所容
長淮誰是主人翁
江南父老還相念
只欠一帆東海風

昨夜分明夢到家
飄颻依舊客天涯
故園門掩東風老
無限杜鵑啼落花

懷則堂實堂

二先生於予厚予之惓惓於二先生知二先生亦
惓惓於予也

白頭北使駕雙羈沙濶天長淚曉煙中夜想應發深省
故人南去地行仙

貴卿

貴卿與余同患難自二月晦至今日無日不與死
為鄰平生交游舉目何在貴卿真吾異姓兄弟也
天高併地迴與子獨牢愁初作燕齊客今為淮海遊半

生誰俯仰一死共沉浮我視君年長相看此惠州

惠州
予弟

璧也

憶太夫人

三生命孤苦萬里路酸辛屢險不一險無身復有身不
忘聖天子幾負太夫人定省今何處新來夢寐頻

即事

痛哭辭京闕微行訪海門久無鷄可聽新有虱堪捫白
髮應多長蒼頭少有存但令身未死隨力報乾坤

紀間

九十春光好周流人鬼關人情輕似土世路險於山俯
仰經行處死生談笑間近時最難得旬日海陵間

聲苦

萬死奔波落一生飄零淮海命何輕近來學得趙清獻
叫苦時時數十聲

即事

船隻時閒鎖城孤日閉闕驚心時有馬極目奈無山去

路相傳險行囊愈覺慳歸心風絮亂無奈一身閒

發海陵

自二月十一日海陵登舟連日候伴問占苦不如意會通州六校自維揚回有弓箭可仗遂以孤舟於二十一日早徑發十里驚傳馬在塘灣亟回晚乃解纜前途吉凶未可知也

自海陵來向海安分明如度鬼門關若將九折回車看倦鳥何年可得還

聞馬

二十一夜宿白蒲下十里忽五更通州下文字馳
舟而過報吾舟云馬來馬來於是速張帆去荒迫
不可言二十三日幸達城西門鎖外越一日聞吾
舟過海安未遠即有馬至縣使吾舟遲發一時頃
已為囚虜矣危哉

過海安來奈若何舟人去後馬臨河若非神物扶忠直
世上未應僥倖多

如臯

如臯縣隸有秦州朱省二者受北命為宰率其民
桔道路予不知而過之既有聞為之驚嘆

雄狐假虎之林臯河水腥風接海濤行客不知身世險
一窓春夢送輕舸

聞諜

予既不為制鉞所容行至通州得諜者云鎮江府
走了文相公許浦一路有馬來捉聞之悚然為賦

此

北來追騎滿江濱那更元戎按劍嗔不是神明扶正直
淮頭何處可安身

哭金路分應

金應以筆札往來吾門二十年性烈而知義不為
下流去年從予勤王補兩武資今春特授承信郎
東南第六正將贛州駐劄及予使北轉三官授江
南西路兵馬都監贛州駐劄予之北行也人情莫

不觀望僚從皆散雖親僕亦逃去惟應上下相隨
更歷險難奔波數千里以為當然蓋委身以從死
生休戚俱為一人者至通州住十餘日矣閏月五
日忽伏枕命醫三四熱病增劇至十一日午氣絕
予哭之痛其歛也以隨身衣服其棺如常翌日葬
西門雪窖邊棺之上排七小釘又以一小板片覆
於七釘之上以為記不敢求備者邊城無主恐貽
身後之禍異時遇便取其骨歸葬廬陵而後死者

之目可閉也傷哉傷哉為賦二詩焚其墓前

我為吾君役而從乃主行險夷寧異趣休戚與同情遇
賊能無死尋醫劇不生通川一丘土相望淚如傾

明朝吾渡海汝魄在它鄉六七年華短三千客路長招
魂情黯黯歸骨事茫茫有子應年長平生不汝忘

懷楊通州

江波無奈暮雲陰一片朝宗只此心今日海頭覓船去
始知百煉是精金

喚渡江沙眼欲枯
羈臣中道落崎嶇
乘船不管千金購
漁父真成大丈夫

范叔西來變姓名
綈袍曾感故人情
而今未識春風面
傾蓋江湖話一生

仲連義不帝西秦
拔宅逃來住海濱
我亦東尋烟霧去
扶桑影裏看金輪

海船

海船與江船不同
自寇難以來從淮入浙者必由

海而通為孔道也由是海船發盡適三月間方有
台州三薑船至已為曹大監鎮所雇通州有下文
字自定回張少保恰予之以一船亦是三月方到
岸而予適來楊守遂以此舟送予與曹大監俱南
向使有薑船而無張少保一舟予不能行有張少
保而無薑船予又無伴不我先後適有邂逅殆神
施鬼設而至也

海上多時斷去舟公來容易渡南州子胥江上逢漁父

莫是神明遣汝不

發通州

予萬死一生得至通州幸有海船以濟閏月十七
日發城下十八日宿石港同行有曹大監鎮兩舟
徐新班廣壽一舟舟中之人有識予者

孤舟漸漸脫長淮星斗當空月照懷今夜分明棲海角
未應便道是天涯

白骨叢中過一春東將入海避風塵姓名變盡形容改

猶有天涯相識人

淮水淮山阻且長孤臣性命寄何鄉只從海上尋歸路
便是當年不死方

石港

王陽真畏道季路漸知津山鳥喚醒客海風吹黑人乾
坤萬里夢烟雨一年春起看扶桑曉紅黃六六鱗

賣魚灣

賣魚灣去石港十五里許是日曹大監膠舟候潮

方能退

風起千灣浪潮生萬頃沙春紅堆蟹子晚白結鹽花故
國何時訊扁舟到處家狼山青兩點極目是天涯

即事

宿賣魚灣海潮至漁人隨潮而上買魚者邀而即
之魚甚平

飄蓬一葉落天涯潮濺青紗日未斜好事官人無勾當
呼童上岸買青蝦

北海口

淮海本東海地於東中云南洋北洋北洋入山東
南洋入江南人趨江南而經北洋者以楊子江中
渚沙為北所用故經道於北復轉而南蓋遼繞數
千里云

滄海人間別一天只容漁父釣蒼煙而今蜃起樓臺處
亦有北來蕃漢船

出海

二十一夜宿宋家林泰州界二十二日出海洋極
目皆水水外惟天大哉觀乎

一團蕩漾水晶盤四畔青天作護闌著我扁舟了無礙
分明便作混淪看

水天一色玉空明便似乘槎上太清我愛東坡南海句
茲游竒絕冠平生

漁舟

二十八日乘風行入通州海門界午拋泊避潮忽

有十八舟上風冉冉而來疑為暴客四船戒嚴未
幾交語而退是役也非應對足以禦侮即為魚矣
危乎殆哉

一陣飛帆破碧烟鬼郎驚餌理弓弦舟中自信婁師德
海上誰如魯仲連初謂悠揚真賊艦後聞欸乃是漁船
人生漂泊多磨折何日山林清晝眠

楊子江

自通州至楊子江口兩潮可到為避渚沙及許浦

顧諸從行者故繞去出北海然後渡楊子江

幾日隨風北海游回從楊子大江頭臣心一片磁針石
不指南方不肯休

使風

渺渺茫茫遠愈微乘風日夜赴東歸半醒半困模糊處
一似醉中騎馬飛

蘇州洋

一葉漂搖楊子江白雲盡處是蘇洋便如伍子當年苦

只少行頭寶劍裝

過楊子江心

大海中一條自楊子江直上淡者是此乃長江盡
處橫約百二十里吾舟乘風過之一時即鹹水

渺渺乘風出海門一行淡水帶潮渾長江盡處還如此
何日岷山看發源

入浙東

金鰲山在台州界高宗皇帝曾艤舟於此寺藏御

書四明既陷不知天台存亡憂心如擣見於此詩
厄運一百日危機九十遭孤蹤落虎口薄命付鴻毛漠
漠長淮路茫茫巨海濤驚魂猶未定消息問金鰲

夜潮

雨惡風寧夜色濃潮頭如屋打孤篷漂零行路丹心苦
夢裏一聲何處鴻

亂礁洋

自北海渡楊子江至蘇州洋其間最難得山僅得

蛇山洋山大小山數山而已自入淞東山漸多入
亂礁洋青翠萬疊如畫圖中在洋中者或高或低
或大或小與水相擊觸奇怪不可名狀其在兩傍
者如岸上山叢山實則皆在海中非有畔際是日
風小浪微舟行石間天巧捷出令人應接不暇殆
神仙國也孤憤愁絕中為之心廣目明是行為不
虛云

海山仙子國邂逅寄孤篷萬象畫圖裏千崖玉界中風

揺春浪軟礁激暮潮雄雲氣東南密龍騰上碧空

夜走

舟入東海報者云前有賊船行十數里報如前望
見十餘舟張帆嶼口意甚惡梢人亟取靈山巖路
避之一夕揺船極其荒迫際曉幸得脫去

鯨波萬里送歸舟倏忽驚心欲白頭何處楮衣操劍戟
同時黃帽理兜鍪人間風雨真成夢夜半江山總是愁
鴈蕩雙峰片雲隔明朝躡屨作清游

綠漪堂

予自海舟登台岸至城門張氏家蓋國初名將永德之後主人號哲齋闢堂教子扁綠漪為賦八句義方堂上看窓戶翠玲瓏硯裏雲壇月席間淇水風清聲隨地到直節與天通庭玉森如笋干霄雨露功

過黃巖

予至淮即變姓名及天台境哲齋張為予覓綠漪詩予既賦題云清江劉洙書此過黃巖寄二十字

魏睢變張祿越蠡改陶朱誰料文山氏姓劉名是洙

至溫州

萬里風霜鬢已絲飄零回首壯心悲羅浮山下雪來未
楊子江心月照誰祇謂虎頭非貴相不圖羝乳有歸期
乘潮一到中川寺暗讀中興第二碑

長溪道中和張自山韻

潮風連地吼江雨帶天流宮殿局春仗衣冠鎖月遊傷
心今北府遺恨古東洲王氣如川至龍興海上州

東洲
常州

也

夜靜吳歌咽春深蜀血流向來蘇武節今日子長遊海
角雲為岸江心石作洲丈夫竟何事底用泣神州

和自山

去年予陷敵自山自京寄詩時予已南歸不及領
今聞成誦追和作彼時語痛定思痛痛不可當

春晚傷為客月明思見君我方慕蘇武誰復從田文龍
背夾紅日鴈聲連白雲琵琶漢宮曲馬上不堪聞

林附祖

林附祖福州秀才去年三月四日在無錫道中忽
為北人擒去指為文相公云你門年四十頭戴笠
身著袍脚穿黑靴文書上載了你門如何不是縛
至京口辨驗然後得釋附祖名元龍至南劍為予
言

畫影圖形正捕風書生薄命入罝中北人一似冬烘眼
錯認顏標作魯公

呈小村

予自劍進汀小村過清流來迎不圖此生復相見
萬里飄零命羽輕歸來喜有故人迎雷潛九地聲元在
月暗千山魄再明疑是倉公回已死恍如羊祜說前生
夜闌相對真成夢清酒浩歌雙劍橫

二月晦

元年二月晦予從鎮江脫敵難險阻艱難于今再
見仲春下澣追感墮淚八句

塞上明妃馬江頭漁父船新讐誰共雪舊夢不堪圓遺
恨常千古浮生又一年何時暮春者還我浴沂天

有感呈景山校書諸丈

北風吹春草陽烏日已至天時豈云爽人事胡乃異三
月方皇皇衣冠道如墜棟撓榱桷折木顛楨榦悴大者
懷端憂焦頭求室燬小者嗟行役泥塗跋其尾長平與
新安露齒如櫛比賦分本爾殊適與天時值哲人處明
夷致命以遂志但令守吾貞死生浩無愧

即事

去年傷北使今日嘆南馳雲濕山如動天低雨欲垂征
夫行未已游子去何之正好王師出崆峒麥熟時

所懷

世途嗟孔棘行役苦斯頻良馬比君子清風來故人相
看千里月空負一年春便有桃源路吾當少避秦

自嘆

草宿披宵露松餐立晚風亂離嗟我在艱苦有誰同祖

遼關河志程嬰社稷功身謀百年事宇宙浩無窮

補遺

題蘇武忠節圖有序

余在京口城外日夜求脫不得間謝村去平江欲
逃又不果至鎮江事益急議趨真州余杜密謀杜
云事濟萬幸不幸謀泄當死死有怨乎余指心自
誓云死靡悔且辦匕首事懼不濟挾以自殺杜云
亦請以死自効於是計遂定既至真州城下問者

羣至告以余在鎮江走脫城中諸校皆出既延入
城苗守遂見語國事移時感慨流涕即往往清邊
堂時從亡者始至也引至直司搜身上所藏軍器
既無他然後見信防閑嚴密如此向使一疑字橫
於胸中閉門不納天地茫茫何所歸宿嘻其危哉
苗守袖出李龍眠畫漢蘇武忠節圖求余詠題撫
卷淒涼浩氣憤發使人慷慨激烈有去國思君之
念矣遂賦三詩書於卷後時丙子三月二日也文


天祥執筆於清邊堂之寓舍

忽報忠圖紀歲華東風吹淚落天涯蘇卿尚有歸時國
老相無無去後家烈士喪元心不易達人知命事何嗟
生平愛覽忠臣傳不為吾身亦陷車

獨伴羝羊海上遊相逢血淚向天流忠貞已向生前定
老節須從死後休不死未論生可喜雖生何恨死堪憂
甘心賣國人何處曾識蘇公義膽不

漠漠愁雲海戍迷十年何處望京師李陵罪在偷生日

蘇武功成未死時鐵石心存無鏡變君臣義重與天期
縱饒夜久風塵黑百鍊丹心涅不緇



文山集卷十八